



ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
Ո Ր Ո Շ ՈՒ Մ Ը

2021 ԹՎԱԿԱՆԻ ՄԱՅԻՍԻ 13-ԻՆ ՄՈՍԿՎԱՅՈՒՄ ՍՏՈՐԱԳՐՎԱԾ՝ «ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ԵՎ ՌՈՒՍԱՍՏԱՆԻ ԴԱՇՆՈՒԹՅԱՆ ԿԱՌԱՎԱՐՈՒԹՅԱՆ ՄԻՋԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ԵՎ ՌՈՒՍԱՍՏԱՆԻ ԴԱՇՆՈՒԹՅԱՆ ՆԵՐՔԻՆ ԳՈՐԾԵՐԻ ՄԱՐՄԻՆՆԵՐԻ ԻՐԱՎԱՍՈՒԹՅԱՆԸ ՎԵՐԱԲԵՐՈՂ ՀԱՐՑԵՐԻ ՇՈՒՐՋ ՏԵՂԵԿԱՏՎԱԿԱՆ ՓՈԽԳՈՐԾԱԿՑՈՒԹՅԱՆ ԵՎ ԷԼԵԿՏՐՈՆԱՅԻՆ ԵՂԱՆԱԿՈՎ ՏԵՂԵԿԱՏՎՈՒԹՅԱՆ ՓՈԽԱՆԱԿՄԱՆ ՄԱՍԻՆ» ՀԱՄԱՁԱՅՆԱԳՐՈՒՄ ԱՄՐԱԳՐՎԱԾ ՊԱՐՏԱՎՈՐՈՒԹՅՈՒՆՆԵՐԻ՝ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՅԱԼ ԳՈՐԾՈՎ

Քաղ. Երևան

19 հոկտեմբերի 2021թ.

Սահմանադրական դատարանը՝ կազմով. Ա. Դիլանյանի (նախագահող),
Վ. Գրիգորյանի, Ա. Խաչատրյանի, Ե. Խունդկարյանի, Է. Շաթիրյանի,
Ա. Պետրոսյանի, Ա. Վաղարշյանի,

մասնակցությամբ (գրավոր ընթացակարգի շրջանակներում)՝

Կառավարության ներկայացուցիչ՝ Հայաստանի Հանրապետության ոստիկանության պետի տեղակալ Ա. Ֆիդանյանի,

համաձայն Սահմանադրության 168-րդ հոդվածի 3-րդ կետի, 169-րդ հոդվածի 3-րդ մասի, ինչպես նաև «Սահմանադրական դատարանի մասին» սահմանադրական օրենքի 23, 40 և 74-րդ հոդվածների,

դռնբաց նիստում գրավոր ընթացակարգով քննեց «2021 թվականի մայիսի 13-ին Մոսկվայում ստորագրված՝ «Հայաստանի Հանրապետության կառավարության և Ռուսաստանի Դաշնության կառավարության միջև Հայաստանի Հանրապետության ոստիկանության և Ռուսաստանի Դաշնության ներքին գործերի մարմինների իրավա-

սությանը վերաբերող հարցերի շուրջ տեղեկատվական փոխգործակցության և էլեկտրոնային եղանակով տեղեկատվության փոխանակման մասին» համաձայնագրում ամրագրված պարտավորությունների՝ Սահմանադրությանը համապատասխանության հարցը որոշելու վերաբերյալ» գործը:

Կառավարությունն իր՝ 2021 թվականի հուլիսի 22-ի N 1175-Ա որոշմամբ 2021 թվականի մայիսի 13-ին Մոսկվայում ստորագրված՝ «Հայաստանի Հանրապետության կառավարության և Ռուսաստանի Դաշնության կառավարության միջև Հայաստանի Հանրապետության ոստիկանության և Ռուսաստանի Դաշնության ներքին գործերի մարմինների իրավասությանը վերաբերող հարցերի շուրջ տեղեկատվական փոխգործակցության և էլեկտրոնային եղանակով տեղեկատվության փոխանակման մասին» համաձայնագրում ամրագրված պարտավորությունների՝ Սահմանադրությանը համապատասխանության հարցը որոշելու նպատակով դիմել է Սահմանադրական դատարան: Հիշյալ որոշումը Հայաստանի Հանրապետության վարչապետը Սահմանադրական դատարան է ներկայացրել 2021 թվականի հուլիսի 28-ին:

Գործի քննության առիթը Կառավարության՝ 2021 թվականի հուլիսի 28-ին Սահմանադրական դատարան մուտքագրված դիմումն է:

Ուսումնասիրելով վերոնշյալ համաձայնագիրը, Կառավարության ներկայացուցչի գրավոր բացատրությունը և գործում առկա մյուս փաստաթղթերը՝ Սահմանադրական դատարանը **Պ Ա Ր Զ Ե Ց**.

1. «Հայաստանի Հանրապետության կառավարության և Ռուսաստանի Դաշնության կառավարության միջև Հայաստանի Հանրապետության ոստիկանության և Ռուսաստանի Դաշնության ներքին գործերի մարմինների իրավասությանը վերաբերող հարցերի շուրջ տեղեկատվական փոխգործակցության և էլեկտրոնային եղանակով տեղեկատվության փոխանակման մասին» համաձայնագիրը (այսուհետ՝ Համաձայնագիր) ստորագրվել է 2021 թվականի մայիսի 13-ին Մոսկվայում՝ Հայաստանի Հանրապետության ոստիկանության և Ռուսաստանի Դաշնության իրավասու մարմինների միջև տեղեկատվական փոխգործակցության և էլեկտրոնային եղանակով տեղե-

կատվության փոխանակման հարցերում համագործակցության զարգացման նպատակով:

2. Համաձայնագրի առարկան է էլեկտրոնային տարբերակով տեղեկատվական փոխգործակցության կազմակերպումը՝ Հայաստանի Հանրապետության և Ռուսաստանի Դաշնության միջև գործող միջազգային պայմանագրերի շրջանակներում, որոնց կատարման համար իրավասու մարմիններ են սահմանվել Հայաստանի Հանրապետության ոստիկանությունը և Ռուսաստանի Դաշնության ներքին գործերի նախարարությունը:

Վերոհիշյալ իրավասու մարմինները որոշում են տեղեկատվական փոխգործակցության ապահովման համար լիազորված ստորաբաժանումների ցանկը և այդ մասին տեղեկացնում միմյանց (Հոդված 2, պարբերություն 4):

Կողմերի իրավասու մարմինների տեղեկատվական փոխգործակցությունն իրականացվելու է Համաձայնագրի 3-րդ հոդվածում նշված տեխնիկական արձանագրությունների հիման վրա, ինչպես նաև Կողմ պետությունների ազգային օրենսդրությանը և կողմերի մասնակցությամբ գործող միջազգային պայմանագրերին համապատասխան:

Համաձայնագրի շրջանակներում չի իրականացվում Կողմ պետությունների պետական գաղտնիք հանդիսացող տեղեկատվության փոխանակում:

3. Համաձայնագրով Հայաստանի Հանրապետությունը փոխադարձության հիման վրա ստանձնում է հետևյալ պարտավորությունները.

– ապահովել, որ Հայաստանի Հանրապետության իրավասու մարմինն իրականացնի էլեկտրոնային եղանակով տեղեկատվության փոխանակում՝ օգտագործելով տեղեկատվական համակարգեր, ծրագրային տեխնիկական միջոցներ, և (կամ) Ռուսաստանի Դաշնության իրավասու մարմինն տրամադրի հասանելիություն Հայաստանի Հանրապետության իրավասու մարմնի վարույթում գտնվող տեղեկատվական համակարգերի ռեսուրսներին (այսուհետ՝ տեղեկատվական համակարգեր) (Հոդված 1, պարբերություն 3),

– ապահովել, որ Հայաստանի Հանրապետության իրավասու մարմինն աջակցի տեղեկատվական համակարգերում առկա տեղեկատվության անվտանգության, ամբողջականության և հավաստիության ապահովմանը (Հոդված 1, պարբերություն 4),

– երաշխավորել, որ Հայաստանի Հանրապետության իրավասու մարմինը կորոշի տեղեկատվական փոխգործակցության ապահովման համար լիազորված ստորաբաժանումները և կտեղեկացնի Ռուսաստանի Դաշնության իրավասու մարմինն Հայաստանի Հանրապետության լիազորված ստորաբաժանումների ցանկի մասին (Հոդված 2, պարբերություն 4),

– ապահովել, որ Համաձայնագրի դրույթների իրականացման համար Հայաստանի Հանրապետության իրավասու մարմնի լիազորված ստորաբաժանումները Ռուսաստանի Դաշնության իրավասու մարմնի լիազորված ստորաբաժանումների հետ մշակեն տեղեկատվական և տեխնոլոգիական փոխգործակցության տեխնիկական արձանագրություններ, որտեղ կսահմանվեն տեղեկատվության փոխանակման նպատակները, տեղեկատվության պաշտպանության կարգը, էլեկտրոնային եղանակով փոխանցվող և ստացվող տեղեկությունների ցանկը, ժամկետները, տեխնոլոգիան, դրանց փոխանցման, պահպանման և ոչնչացման կարգը, տեխնիկական միջոցների տեղադրման, կապուղիների շահագործման հանձնման և դրանց սպասարկման ժամանակացույցը (Հոդված 3, պարբերություններ 1 և 2),

– ապահովել, որ Հայաստանի Հանրապետության իրավասու մարմինը Ռուսաստանի Դաշնության իրավասու մարմինն էլեկտրոնային եղանակով տրամադրի և ստանա իր վարույթում առկա տեղեկատվությունը, և/կամ համաձայն տեխնիկական արձանագրությունների՝ տեղեկատվական համակարգերի ռեսուրսների անհատույց հասանելիությունը՝ իրենց կողմից համաձայնեցված ծավալով, ինչպես նաև ամրագրի տեղեկատվության տրամադրումը, ձեռքբերումը և ոչնչացումը (Հոդված 4, պարբերություն 1),

– ապահովել, որ Հայաստանի Հանրապետության իրավասու մարմինն ամրագրի Ռուսաստանի Դաշնության իրավասու մարմնի հասանելիությունն իր տեղեկատվական համակարգերի ռեսուրսներին (Հոդված 4, պարբերություն 1),

– ապահովել, որ Հայաստանի Հանրապետության իրավասու մարմինն ապահովի Համաձայնագրի շրջանակներում ձեռք բերվող տեղեկատվության անվտանգությունը՝ համաձայն Հայաստանի Հանրապետության օրենսդրության պահանջների և այն միջազգային պայմանագրերի, որոնց մասնակից է հանդիսանում Հայաստանի Հանրապետությունը (Հոդված 4, պարբերություն 1),

– երաշխավորել, որ Համաձայնագրի շրջանակներում ստացված տեղեկատվությունը Հայաստանի Հանրապետության իրավասու մարմնի կողմից կօգտագործվի բացառապես ծառայողական նպատակներով և առանց տեղեկատվությունը տրամադրած Ռուսաստանի Դաշնության իրավասու մարմնի նախնական գրավոր համաձայնության՝ չի փոխանցվի երրորդ կողմին (Հոդված 4, պարբերություն 1),

– երաշխավորել Հայաստանի Հանրապետության իրավասու մարմնի կողմից տեղեկատվական անվտանգության պահանջների և տեղեկատվական համակարգերում աշխատանքի կանոնների պահպանումը (Հոդված 4, պարբերություն 1),

– ապահովել, որ անդրսահմանային կապուղիներով փոխանցվող տեղեկատվության պաշտպանությունն իրականացվի տեղեկատվական փոխգործակցության տեխնիկական արձանագրություններին համապատասխան, երաշխավորելով, որ Հայաստանի Հանրապետության իրավասու մարմինը կապահովի տրամադրվող տեղեկատվության ամբողջականությունը, հավաստիությունը և արդիականությունը (Հոդված 4, պարբերություններ 3 և 4),

– ապահովել, որ տեղեկատվական համակարգերը վարող Հայաստանի Հանրապետության իրավասու մարմնի կողմից տեղեկատվության պահպանումը և ոչնչացումն իրականացվի տեխնիկական արձանագրություններին, Հայաստանի Հանրապետության օրենսդրությանը և Հայաստանի Հանրապետության միջազգային պարտավորություններին համապատասխան, այդ թվում նաև՝ Համաձայնագրի գործունեության դադարեցումից հետո (Հոդված 5),

– ինքնուրույն կրել Համաձայնագրի իրականացմանն ուղղված ծախսերը (Հոդված 7):

4. Համաձայն Համաձայնագրի 6-րդ հոդվածի՝ տեղեկատվական անվտանգության պահանջների և տեղեկատվական համակարգերում աշխատանքի կանոնների խախտումներ հայտնաբերելու դեպքերում, տեղեկատվություն տրամադրող Կողմ պետության իրավասու մարմինն իրավունք ունի դադարեցնել տեղեկատվությունը ստացող Կողմ պետության իրավասու մարմնի հասանելիությունը տեղեկատվական համակարգերին:

Ելնելով գործի քննության արդյունքներից և ղեկավարվելով Սահմանադրության 168-րդ հոդվածի 3-րդ կետով, 170-րդ հոդվածի 1-ին և 4-րդ մասերով, «Սահմանադրական դատարանի մասին» սահմանադրական օրենքի 63, 64 և 74-րդ հոդվածներով՝ Սահմանադրական դատարանը **Ո Ր Ո Շ Ե Ց**.

1. 2021 թվականի մայիսի 13-ին Մոսկվայում ստորագրված՝ «Հայաստանի Հանրապետության կառավարության և Ռուսաստանի Դաշնության կառավարության միջև Հայաստանի Հանրապետության ոստիկանության և Ռուսաստանի Դաշնության ներքին գործերի մարմինների իրավասությանը վերաբերող հարցերի շուրջ տեղեկատվական փոխգործակցության և էլեկտրոնային եղանակով տեղեկատվության փոխանակման մասին» համաձայնագրում ամրագրված պարտավորությունները համապատասխանում են Սահմանադրությանը:

2. Սահմանադրության 170-րդ հոդվածի 2-րդ մասի համաձայն՝ սույն որոշումը վերջնական է և ուժի մեջ է մտնում հրապարակման պահից:

ՆԱԽԱԳԱՀՈՂ



Ա. ԴԻԼԱՆՅԱՆ

19 հոկտեմբերի 2021 թվականի
ՍԴՈ-1614